

Consul di Venezuela, Carlos Mata Figueroa:

'Proyectonan bon ta na caminda cu lo yuda economia di Aruba'



ORANJESTAD – Ayera e consul nobo di Venezuela, Carlos Mata Figueroa a haci su prome presentacion publico na Aruba. Esaki a sosode un luna despues cu el a establece su mes como diplomatico di su pais riba nos isla. El a haci esaki den cuadro di conmemoracion di e 207 aniversario di indepen-

dencia di Venezuela.

Den su prome entrevista pa un medio local, sr. Mata Figueroa a declara na Bon Dia Aruba cu e acto protocolario cu nan a realiza riba plaza Simon Bolívar ta parti di e celebracion cu a tuma luga den henter Venezuela ayera. E fecha historico di 5 di juli di 1811 ta wordo re-

corda, ya cu e dia ey un grupo di diputado a firma e acta di independencia.

El a probecha di e ocasion aki pa manda un mensahe pa tur Venezolano cu ta biba den e bunita pais di Aruba. Den cuadro di dia di nan independencia, e diplomatico a laga sa cu yen di alegria, cu e tin solamente palabranan di gradici-

mento pa Aruba. Encuanto e impasse bilateral cu a surgi tocante e embargo aereo y maritimo di Venezuela riba nos pais, e diplomatico a bisa cu actualmente e relacion di fraternidad ta solido.

E diplomatico a laga sa cu e relacion bilateral aki lo bira mas miho ainda, ya cu bon noticia y proyectonan positivo ta na caminda cu lo tin su influencia riba nos economia. Pero el a prefera di abstene di duna mas detaye riba e proyectonan aki, ya cu ainda e no tin autorizacion pa papia riba nan. Pero si el a laga sa cu nan ta 'bon noticia di masha interes pa Aruba'. Nan ta proyectonan di interes comun pa ambos pueblo, e di.

Tambe el a expresa cu e ta masha contento di por comparti cu e pueblo di Aruba cu tambe tin un libertador y cu tin su propio historia. "Tambe Aruba tin nan custumber cu tambe nos mester respeta. Nos ta sinti nos mes orguyoso di por comparti cu boso", e consul a bisa.

Sr. Mata Figueroa a bisa cu den e luna cu e tin na Aruba,

tur cos ta bayendo bon pe. E ta haya cu Aruba ta brinda tur oportunidad pa nan hiba un bida trankilo akinan. "Mi tin un luna caba na Aruba y tur cos ta bay bon." El a agrega cu autoridatnan di Aruba y su gobierno ta hendenan increibel den nan trato y maneho. Mi a haya un bon receptividad, danki na e comunidad di Aruba y nos pueblo estableci na Aruba."

Encuanto su fam, esta Mata Figueroa y su eventual vinculo familiar cu nos isla, e diplomatico a bisa cu e no sa si esaki ta berdad. Pero nan fam ta uno cu a wordo plama den tur parti. Pero si el a bisa cu su mama di fam Figueroa ta di Corsou, y su tata ta Mata di Venezuela.

